



Republic of Palau

Ministry of Health

P. O. Box 6027 Koror, Republic of Palau 96940

Phone: +680 488-2552 or +680 775-1310 Fax: (680) 488-1211

email: administration@palauhealth.org website: www.palauhealth.org

Tekingel a Minister ra Health el Dr. Emais Roberts el kirel a Omengesimer (quarantine) me a Omeleakl (isolation) er a rechad el smecher me a lechub e ngar ngii a techellir el smecher er tial rakt el COVID-19 – DIAZ Broadcasting, Friday 4/10/2020, 7pm -8pm

Ng kmal ungil el sils el mo er a remengeteklel me a rokui el chad er a Belau.

Ng ultuil er a melemolem el ureor er a ikrel me a chelsel a Belau, e a Ministry er a Health a kaukledem ngii me a klou el Amt me a kakerous el chelechad er a beluu e mo oltaut a beches el kerebil a llechul a Omengesimer me a Omeleakl er a resmecher er a bekoiuiiul el rakt. Aikang a milktmokl el okiu a obis er a Public Health er se er a edei el kebesengil a Ongeua el Buil er a chelecha el rak el oltirakl er a 34 PNC me a roel a okedbechel a llach.

A mo roel e kede torebengii a bridel tia el rakt el COVID-19, e a rokui el chad el me soiseb er a beluu er a Belau me a lechub e ng chad el medangch el ngar er ngii a techellel el mo smecher er tia el rakt a kirel el mo mechesimer el kesengil e ng teruich me a eua el klebesei er aike el mla mutebechel el olsechall (basio) el Ministry er a Health me a kabelment a mla kutmokl. A lsekum a chad a medangch el smecher er a tia el rakt el COVID-19 e ng kmal kirel el mo meakl e mechesimer er a olsechall (basio) el kabelment a mla kutmokl el kirir a resmecher (e.g., Hospital or Alternate Care Site), me a lechub e ng obliil el di mo ultuil er a kengei er a Ministry er a Health. Ng dirrek el mo ultuil er a techall er aika el mla mutebechel el blai el kirir a resmecher.

Ng soak el mo meketeklii a klekakerous er aika el eru el tekoi me a uchul e kede mo oltaut el ua isei.

A omengesimer (Quarantine) a usbechall el kirel a omengesimerel a chad el ngii a locha ngar er ngii a techellel e ng smecher er tia el COVID-19. **Ng melutk el kirel a chad el mla er a omerael el mo er a beluu el ngar er ngii tia el rakt er ngii, me a lechub e ng kiliei el kmeed er a chad el smecher er a COVID-19.** A chad el mo chelsimer a mo meakl a delengcheklel e mo mekesadel a omerael me a odingel el mo er ngii. A chad a sebechel el moiuiul tia el rakt el mo er ngii e diak lodengei me a ka lebo er ngii a meues el ochotel (symptoms). Tia el omengesimer a ngosukid el torebengii a bridel tia el rakt el COVID-19. Chelechang e a kabelment a mla kutukl a kleuang el blai (hotel) el mo olsechelir tirke el kirir el mo mechesimer e meakl er a rebeluu. Aikang a Palau Central Hotel, Landmark Hotel, MCS, me a Palau Cove Resort.

A omeleakl (Isolation) a usbechall el kirir a **rechad el mla medangch el smecher er tia el rakt, me te mo meakl el cheroid er a rebeluu.** A rechad el smecher a kmal kirir el kiei er aike el mla mutebechel el olsechelir el ileakl er a chad. A lsekum a chad a medangch el okiu aike el kltmokl el kerebil a urerel a ukeruul (travel history/symptoms) er tia el rakt el COVID-19 me a lechub e ng mocha bleketakl el smecher el okiu a skeng e ng mo mechesimer er a Klou el Osbitar me a lechub e ng se el Alternate Care Site (Kalau Gym). A lsekum e ng mocha meseked aika el olsechall (basio) e tirke el chad el oba tia el rakt e ng di diak lsal smecher a di mo chelsimer er a rekeblirir. Ng di tia el teletael a lmuut el mo soadel a lsekum e ng mocha ua isei.

Aki mo mesubed er a rokui el chad el kirir el mo chelsimer me a lechub e ng kirir el mo meakl el kirel a mo teletelel a delengcheklir me a klisel. A rechad el mo chelsimer me a lechub e te mo meakl el cheroid er a rekeblirir a mo er ngii a blai el meketmokl el kirir el uldimukl er a roel a blengur me aike el rokui el ousbech el kirel a omengetmeklel a bedengir. Ng dirrek el mo er ngii a techellir el mangededechudch er a rechad er a blirir me a urerir me a ngii di el chad (families, employers, court and a legal representative).

A Minister er a Health me a lechub e ng ngke el telutk el omtechei er ngii a mui a klisichel el chosmerii me a lechub e ng ekliai a chad el smecher me a lechub e ng ngar er ngii a techellel el smecher er tia el rakt el COVID-19 el uldimukl er a ngii

di el bekoiuiiul el rakt. A Ministry er a Justice a mo oltaut aika el llach el mla mesaod, e a ngii di el chad el tomall a mo obals el kirel a telemellel.

Ak medengeli a ringelel a otireklel aikang el mo er a rederta el chad me a telungalek, me aki mo er aike el sebecham el kutmoki aike el olsechall (basio) el mo ungil el kirir a rechad el mo er ngii, e a osisiu el taem e ng sobecheklid a rechad me a beluu er a Belau er tia el rakt el *COVID-19*.

Ak kmal olengit er a kllouerrang me a ngeso er a rebek el chad. Kom Kmal Mesaul.